

NOFOA'IGA TOLUSEFULU FONOFAITULAFONO A AMERIKA SAMOA

FONO TELE MUAMUA

Nofoa ma usuia i Fagatogo, Tutuila, Amerika Samoa
 Aso Gafua, aso valu o Ianuari
 lua afe ma le fitu

O SE TULAFONO E FAATAGA AI LE MALO O AMERIKA SAMOA E FAIA SE MALILIEGA MA LE TUPE O LE LITAEA A TAGATA FAIGALUEGA A LE MALO MO SE NOGATUPE; FAASOA AI TUPE MO LE TOE TOTOGIINA O LEA NOGATUPE MA FAAILOA LE MEA E SAU AI IA TUPE; FAATAGA AI LE FAAAOGA O TUPE MAI LE NOGATUPE E FAATUPE AI LE FAATINOINA MA LE FAALELEIA ATILI O GALUEGA TETELE MA POROKALAMA; TOE FETUUNAI AI LE MAUALUGA E MAFAI ONA OO I AI TUPE INIVESI A LE LITAEA MA TUPE NA TE FAAUNE ATU I LE MALO O AMERIKA SAMOA; FAASOASOA AI TUPE MAUA MA FAAILOA LE MEA E SAU AI LE TUPE; MA AIAIA AI SE ASO VAVE E TAUALOA AI; SUIA AI MAGA 7.1444, 11.1002, MA LE 27.1014 TTAS; FAAVAE AI SE MAGA 7.1444.5 TTAS; MA SOLOIA AI LE MAGA 7.1444.3 TTAS.

Faatomuaga:

Talu ai le manaoga vave ina ia maua se faatagaga e faia ai e le Malo o Amerika Samoa se maliliega ma le Tupe o le Litaea mo se nogatupe e faatupe ai le faagaioia ma faaleleia o ofisa o le malo ma isi galuega tetele o lea o le a taualoa ai lenei tulafono i le taimi lava e pasia ai e le Fonofaitulafono ma faamaonia e le Kovana.

IA FAATULAFONOINA E LE FONOFAITULAFONO O AMERIKA SAMOA:

Maga 1. 7.1444 ua suia nei e faitauina faapea:

"7.1444 Teuina (inivesi) o tupe faaleoleo e sili atu i manaoga ia o loo f ai nei.

(a) O tupe faaleoleo a le Tupe (Litaea) e sili atu i lo mana'oga o loo i ai mo ana galuega i le taimi nei, e inivesi ma toe inivesi foi i le pule a le Komiti Tausimavaega. I lana faitalia, e mafai ai e le Komiti ona tofia o se toatasi o sui pe sili atu foi e vaavaaia le matafaioi lenei; poo le fea lava la o mea nei e lua, o taimi uma e ta'ua ai le Komiti i le maga lenei e faatatau lava lea i le tagata poo le komiti foi o loo vaaia pe faatinoina le matafaioi lea.

(e) O le Komiti Tausimavaega (Komiti Faafae) e i ai le malosia atoa lava ma le pule e faatonu ai le inivesi ma le toe inivesi atili o le tupe e aunoa ma se faailogaina poo se tupe amata poo se tupe maua, i meatotino (e pei ona o le a ta'ua i le (i) i lalo) e manatu ia e talafeagai ai. E mafai e le Komiti ona inivesi ma

toe inivesi le tupe i meatotino e manatu se tagata e masani i mea faapea, ma lona faaeteete, lona tomai faapitoa, le pulea lelei, ma le filifili tonu e inivesi ai ni tupe ina ia mautinoa ai o loo faasalafa solo le teuina o tupe ina ia tuuititia ai le tulaga o le faaono mamulu atu ma soona tele le tupe e maumau, sei vagana ai la e manino mai o sea faiga e le lelei mo le tupe. O le malosi e pulea ai inivesi e aofia ai ae le gata ai iina, le malosi e taofi ai, faatau mai, faatau atu, fesuia'i, lafoai, lisi, pe vaevae ni aseta o loo taofia poo ni tupe foi e maua mai ai, ina ia faatinoina ai ni faamaumauga poo ni pepa e talafeagai ai; e faia ai ni maliliea e puipuia ai, le malosi e fai ai ma sui o le isi tagata, tuu mai ai se faatagaga; ma fai ai isi mea uma lava e tatau ai I lona tulaga o ia e ana le mea lea poo ia foi lea o loo nofoaitalafu ai se tasi.

(i) O le upu o le "meatotino" e aofia ai ni mea tau fanua, o mea tau le tagata lava ia, ma meatotino fefiloi o soo se ituaiga lava, e aofia ai ae le pau ai lea, pone o soo se ituaiga, mokesi, se aia i soo se ituaiga o inivesi e faaagaaga mo nisi, ni folafolaga tusitusia mo le totogiina o ni tupe, lisi, o ni tupe maua mai i ni siea o suaau poo le kesi poo nisi lava faamaoniga o ni aia mo ni meatotino faapena.

(o) O tupe uma lava e maua mai inivesi, o soo se ituaiga, e tatau ona tuuina i totonu o le Tupe o le Litaeta. O fefaataua'iga ma gaioiga e faia I ni mea e folafolaina e totogi ai ni aitalafu, e tatau lava ona faia lea i tau o loo malosi i le maketi i lona taimi.

(u) O tupe inivesi e mafai ona faia i se igoa pe lesitala foi a le o le igoa o le tupe poo se tasi e filifilia mo le tausia o le tupe.

(f) O pili mo tupe totogi atu e mafai ona taliaina mai sui na latou feutaga'ia aitalafu mo le totogi o mea na faatau mo le toe totogiina atu o aitalafu, e faatalitali ai le aumaia o tupe e faamaonia ai inivesi i se taimi talafeagai.

(g) E le mafai ona faia ni inivesi pe afai e uma ane ona faia ae maua e le tupe mea nei:

(1) soo se tunfaatasiga o mea e totogi a soo se soavaega faapolokiki, sosaiete, poo seisi vaega toatasi e silia i le 5 pasene o aseta a le Tupe o le Litaeta, i le tau na aumai ai.

(2) aitalafu a Kanata, faatasi ai ma ona soavaega faapolokiki ma sosaiete na faia i lalo o ana tulafono poo tulafono a ona itumalo e sili atu i le 10% o aseta a le tupe na aumai ai; poo

(3) aitalafu poo isi inivesi na faia pe na folafola foi e faamauina e le malo e silia i le ~~40~~ 17.5 pasene o aseta a le Tupe i tau na aumai ai; pe afai lea, o lenei tuutapulaa e le aafia ai folafolaga/aitalafu poo isi inivesi e faamauina le tupe amata ma le tupe tului, e aunoa ma se noataga pe lagolagoina foi i se lisi ua fesui mai, seisi vaega e faia lana pisinisi autu i fafo atu o Amerika Samoa.

(l) E mafai e le Komiti ona faaoga se faletupe e tasi pe sili atu foi e fai ma vaega latou te vaaia le tupe e pei o le tausia o aseta poo faamaoniga o aseta. O le vaega la lea e fai mai a latou lipoti, ma isi faamaumauga uma i se faiga ma taimi e pei ona talosagainaina e le Komiti. O totogi uma o auunaga tau le vaaia o tupe e totogi lava e le Tupe o le Litaeta. O le tausitupe e taofia aseta uma mo le

Tupe ma galue faatatau i faatonuga mai le komiti. E le faaaogaina lava vaega tausi tupe ia sei vagana ai:

(1) ua leva ona galue pea i galuega tau inivesi o tupe mo nisi mo se vaitaimi e 10 tausaga ma sili atu; ma

(2) na tuufaatasia e tusa ai ma tulafono a le Iunaite Setete, se setete poo se Teritori; ma

(3) e fai ma tausi tupe mo ni tupe o litaea e le itiiti ifo i le 20 a ni kamupani, ni aai tetele ma ni malo e le itiiti ifo i le \$30,000,000 a latou aseta.

(m) Ina ia maua fautuaga lelei ma mausali, e mafai e le Komiti ona faaaoga se tagata tomai i mea tau inivesi e pei ona ta'ua ona agavaa i lenei soamaga. E mafai foi ona fai ma sui inivesi le vaega lea e tausia tupe. O pili uma lava e mafua mai i galuega nei e totogiina e le tupe o le litaea. E mafai ona le agavaa ni tagata, kamupani poo ni sosaiete e galulue e fai ma sui inivesi pe afai o ia o se sui mo ia lava poo se sui foi mo se isi tagata e ese mai ai i le tupe, e fesootai ma le faatauina atu o ni mea na folafola mo le totogiina o se aitalafu poo le faatauina mai foi o se mea faapea mai le Tupe o le Litaea. E le mafai ona faaaoga o ni sui e faia inivesi sei vagana:

(1) o le pisinisi autu a le tagata, kamupani, poo se sosaiete foi na filifilia e le Komiti e i ai le faatinoina o auunaga e vaavaaia ai inivesi; o lona uiga, o le tuuina mai o fautuaga faifaipea faatatau i le inivesi o tupe e faatatau i mana'oga o tagata taitoatasi o ana tagata;

(2) o le vaaiga autu lava a le tagata, le kamupani, poo le sosaiete e mo tagata o loo ola pea lo latou auai i le pisinisi;

(3) o le tagata, kamupani, poo le sosaiete ma isi na muamua atu ia i latou o loo faaauau pea lava ona galulue i lea pisinisi mo se vaitaimi e 10 tausaga pe sili atu;

(4) o le tagata, kamupani, poo le sosaiete o loo lesitala o se fautua mo inivesi i lalo o tulafono a le Iunaite Setete;

(5) o le konekarate i le va o le Komiti ma sui inivesi e le o faapito mai se umi e fai ai ma e mafai ona faaleaogaina i soo se taimi lava e se tasi o i la'ua; ma

(6) o le tagata, le kamupani, poo le sosaiete o loo faamaonia, i se tusitusiga i le Komiti, o aseta o loo i lalo o lana vaaiga tau inivesi tuusa'o e silia i le \$30,000,000. E faavaeina e le Komiti ma e mafai foi ona ia suia mai lea taimi i lea taimi fetuunaiga o le faia o galuega ma le sui inivesi ina ia faafaigoffie ai le pulea lelei ma vave le faia o gaioiga mo inivesi. E le faia ni inivesi sei vagana ai e manatu le sui inivesi o se inivesi e tatau ona fai mo le Tupe o le Litaea ma o se inivesi foi e faatagaina, ae a leai foi se manatu faapea, sei vagana ai ua fai muamua se iugafono e le Komiti e faatonu ai le faia o lea inivesi."

Maga 2. Ua suia nei le 11.1002 e faitauina faapea:

"11.1002 Aofai o lafoga o nisi o oloa.

(a) O le lafoga mo oloa taitasi e faapenei:

(1) pia, molo, taumafa e i ai le 'avamalosi (alakaholo), tapaa ma mea e faaaoga mo le taumafaina o le tapaa:

(A) O le 190% o le faavae o le pia e pei ona faamatalaina i le 27.0501(6), ma le molo, vagana ai se tagata ua 21 tausaga le matua pe sili atu foi e mafai ona ia aumaia e aunoa ma se lafoga soo se taumafa 'ava malosi e tusa ai ma le mea o loo ta'u mai i le 27.0501(1) poo le 27.0501(6) ia le silia le lita i le malaga pe afai o sea 'avamalosi e faaaoga mo ia lava ae le mo se toe faatauina atu; ma sei vagana foi o se taumafa 'avamalosi poo ni oloa tau tapaa e aumai i Amerika Samoa mo le toe avatua i fafo e le faleoloa leai se tiute i le Malaevaalele Faale-va-malo o Pago Pago e leai se lafoga o ia mea; 150% le faavae o le pia poo le molo o le a teuina i le teugatupe tele ma faaavanoa mo le faasoasoa a le Fonofaitulafono; ma le 40% o le faavae o le pia ma le molo e teu i le teugatupe tele ma ia faailoga ese lava mo le toe totogiina o le nogatupe a le malo lea ua pasia i le 7.1444.3. A mae'a loa ona totogi atoa le nogatupe lea ona soloia loa lea o le aoina o le 40% lea 7.1444.5. A mae'a loa ona toe totogi atoa le nogatupe lea, ona avane loa lea o le lafoga leni e aoina e teu i se teugatupe faapitoa mo le faasoasoina e le Fonofaitulafono;

(E) o taumafa 'avamalosi e pei ona ta'ua mai i le 27.0501(1) o le a faalafogaina faapenei: e sefululima sene (0.15) mo pasene taitasi o le mamafa o le alakaholo oi le lita e tasi, e i ai ma le lafoga aupito maulalo e \$2.00 i le lita.

O tupe maua mai le lafoga o 'avamalosi, e faasoa le 50% mo le Faletusi o le Feleti Barstow; 25% e faasoa mo le Ofisa o le Faamasino o Tulafono tau Galuega (ALJ); 12.5% e tuu i le teugatupe tele e faaavanoa mo le faasoa a le Fonofaitulafono; ma le 12.5% e faailoga ese i le teugatupe tele mo le toe totogiina o le nogatupe a le malo o loo i le 7.1444.3. A mae'a ona totogi uma o le nogatupe lea ona avane lea o le 12.5% lea e teu i se teugatupe faailoga ese mo le toe totogiina o lea o loo pasia i le 7.1444.5. A mae'a ona toe totogi uma o le nogatupe lea, o leni lafoga o le a teuina lea i le teugatupe tele e faaavanoa mai ai mo le faasoasoina e le Fonofaitulafono.

(I) E 12.5 sene (le lafoga) mo le sikaleti e tasi, le sika, poo le tai 10 kalama o le tapaa, sei vagana ai soo se tagata e 21 tausaga le matua pe sili atu, e mafai ona ia aumaia e aunoa ma se lafoga ni oloa tau tapaa e le silia i le 200 sikaleti poo le 100 sika ma se/poo le 2 kilokalama o tapaa i le Malaga pe afai o ia tapaa e faaaoga e ia lava ae le mo se toe faatau atu; e 20% e teuina i se teugatupe faailoga ese mo le toe totogiina o le nogatupe o loo i le 7.1444.3. A mae'a ona totogi uma lea nogatupe ona toe foi lea o le 20% lea i le teugatupe tele mo le toe faasoasoina e le Fonofaitulafono. 7.1444.5. A mae'a ona toe totogi uma le nogatupe lea, ona teuina loa lea o le lafoga lea e ao i le teugatupe a le malo e faaavanoa mai ai mo le faasoasoina e le Fonofaitulafono.

(2) o le 150% o le faavae o auupega ma ututau;

(3) taavale afi.

(A) 25% o le faavae o uilaafi, taavale, loli, ma veni e faaaoga mo pisinisi;

(E) E le afaina ai aiaiga o le palakalafa (A), o le lafoga mo uilaafi, taavale, loli, ma veni e aumai i Amerika Samoa mo le tagata lava ia poo le faaaoga foi e le aiga, e 10%. Ae afai o sea uilaafi, taavale, loli poo se veni e toe sui mulimuli ane ma faaaoga mo se pisinisi e tatau la ona toe totogiina le paleni o le lafoga e pei ona ta'ua i le palakalafa (A).

(I) E leai se faagafuaga, e aofia ai ma lea o loo ta'u mai i le Ulutala 11, Mataupu 16, e tuuina atu mo soo se taavale afi. O isi taavale uma e le o faalafogaina i lalo o le soamaga leni e tatau ona faalafoga i lalo o le 11.1002(a)(7);

(4) oloa tau suauu:

(A) 35 sene i le kalone o le suauu e gaosia mo le faaaoga i taavale, e ese mai ai i le tiso, o le 1.5 sene o lea tupe e faaaoga e totogi ai le faamalosia o le tulafono ma le a'oga avetaavale ae o le 10 sene e ave i se teugatupe e faailoga mo le tausia lelei ai o le auala.

(E) 3 ma le 'afasene i le kalone o suauu e gaosia mo le faaaoga i afi tiso, e ese mai ai suauu vaalele. E i ai se faagafuaga faapitoa lava mo le faaopoopoina o le taimi o le toe faafo'ia o le lafoga atoa lava e 3 ma le 'afasene mo suauu sa faatau atu i soo se vaafagota faapisinisi e utuina ai, pe afai e faamaonia mai lea e le Teutupe o Amerika Samoa. Mo leni lava maga, "o Vaafagota Faapisinisi" o lona uiga o vaafagota e faaaoga ai upega tetele ma vaa e faaaoga 'afa'afaloloa e fagogota faapisinisi e silia i le ta'ilima tone le mamafa, faatasi ai ma vaa e la'u i ai uta i'a a "Vaa-Faatinā" ma vaa la'usuauu latou te avatua le suauu e utu ai vaa ia i luga o le sami;

(I) tasi ma le 'afasene i le kalone ole kalasini ma isi oloa faapena;

(O) 15% o le faavae o suauu e faasuauu ai u'amea;

(U) tasi le sene i le kalone o suauu vaalele e tuu i le tupe a le Malaevaalele Faale-va-o-malo mo ana galuega;

(F) 3 sene i le pauna o soo se ituaiga o kesi suauu faasuavaia (LPG);

(G) 31 ma le 'afasene i le kalone, e aoina mai e le kamupani o loo aumaia le suauu i le nofoaga na te faatau atu i ai le suauu, mo le suauu gaosi mo afi tiso, e le aofia ai le tiso o loo faaaoga i ogaumu tetele ma mea e faapupuna ai le vai, o afi tetele gaosi eletise ma vaa o le sami.

(5) 40% o le faavae o meafaufale uma, e pei ona ta'ua i le 26.1501 ma isi maga e mulimuli mai ai, lea e maulalo ifo lona tulaga nai lo le mea o loo ta'u mai i lea lava mataupu;

(6) 15 sene i le 12 aunese faasuavaia poo sona vaega foi, i fagu/apaina uma e leai se alakaholo o i ai, ina ia faaopoopo atu i le fua o le 'apa poo le fagu lea e faatau mai ai;

(7) O le 5% o le faavae o oloa uma lava e le o lisiina i soamaga (a)(1) e oo i le (a)(6) o leni maga pe faagafua foi i leni maga a o loo aumaia mo le faaaogaina faapisinisi poo le toe faatauina atu foi. O tupe maua mai le 3% o le lafoga o oloa o le a teuina i le teugatupe tele mo le faasoaina e le Fonofaitulafono,

vagana ai le \$500,000 e faasoaina mo le fesoasoani tau tupe mo tamaiti a'oga e pei ona aiaia ai i le 11.0605.

(e) O le lafoga aupito maualalo e 25 sene.

(i) O oloa o loo faalafogaina i lalo o soamaga (a)(1) ma le (a)(7) o lenei maga e faagafua lea mai lafoga o loo faaee i le maga lenei pe afai e aumai iinei mo le toe faatauina atu i fafo atu o Amerika Samoa; pe afai lea o le aumaia i totonu ma le faatauina atu o nei oloa e faia e tusa ai ma tulafono galue ua faalauaiteleina e le Teutupe i lalo o le Tulafono o le Faagasologa o Galuega 4.1001 ma faasolo mai ai, e manaomia ai le teuina ese o ia oloa ia manino lelei lo latou faailoaina mo le toe faatau atu i atunuu i fafo atoa ai ma se faiga e tiliva atu ai ia oloa ina ia mautilino ai ua ave i fafo.

(o) O le totogia o lafoga o loo faaee i le maga lenei mo oloa o loo aumaia mo le faaaoga i Amerika Samoa e mafai lava ona tolopoina e tusa ai ma tulafono ua faalauaiteleina e le Teutupe i lalo o le Tulafono o Faagasologa o Galuega 4.1001 ma faasolo mai ai, lea e manaomia ai le teuina ese o ia oloa ia manino lelei ona faailoaina e faapea o oloa ia e faatauina atu mo le faaaoga i totonu lava o le tatou lotoifale atoa ai ma se faiga e tiliva ai i le faioloa ma ia mautilino ai le totogia o le lafoga i le taimi e tiliva ai.

(u) E faalauaiteleina e le Teutupe tulafono galue i lalo o le Tulafono o Faagasologa o Galuega, 4.1001 ma luma mai, ina ia mautilino ai ua totogi lafoga na faaee i le taimi na faia ai le faagafuaga lea e aiaia i le soamaga (a)(7) o lenei lava maga.

(f) O le 1% o le 5% o le lafoga o oloa e faailoga mo le lipea, toe faafou ma faaleleia atili falea'oga uma o le malo ma mea e faaaoga ai e amata mai le tausaga faaletupe e 1995."

Maga 3. 27.1014 ua suia nei e faitauina faapea:

"27.1014 Totogi mo auunaga a ofisa o le Tiute.

(a) E aoina totogi mo auunaga a ofisa o le tiute mai le e ana le vaa, le kapeteni poo se sui foi o le vaa e faapenei:

(1) o le oo atu o ofisa a le tiute i soo se nofoaga e ese mai ai i le taulaga e ulufale mai ai vaa, e \$15.00 i le aso;

(2) o le galue o ofisa o le tiute i luga atu o itula masani faapisinisi, e \$7.50 i le itula;

(3) kiliaina o vaa la'upasese, e \$3 i le taunuu mai ma le toe tuuvaa ese atu;

(4) kiliaina o isi vaa e le la'upasese e \$25.00 i le taunuu mai ma le toe tuuvaa ese atu;

(5) faagasoloina o pepa e Folafola ai ni oloa aumai i totonu mo le Tiute, e \$5.00 mo le folafolaga e tasi i le vaa e tasi. O le totogi lea e le aafia ai pasese. O tupemaua mai galuega ia e tuu i totonu o se teugatupe faaagaaga mo le toe totogiina o le nogatupe a le malo na pasia i le 7.1444.3. ~~A mae'a ona totogi uma le nogatupe lea, o le a soloia loa lea tupe totogi 7.1444.5. A mae'a ona totogi uma~~

lea nogatupe, ona tuu loa lea o le lafoga lenei i le teugatupe tele e faaavanoa mai mo le faasoasoaina e le Fonofaitulafono.

(e) O le faasologa o totogi o loo i le palakalafa (a)(1) ma le (a)(2) o loo fuafua o ia totogi o loo faavae i luga o le tagata/i le itula, poo le tagata foi/i le aso, pe afai o le nofoaga na oo atu i ai ofisa o le tiute e pei ona i ai le palakalafa (a)(1) e motu ese mai le motu o Tutuila, o le totogi la o le pasese, le totogi mo aso taitasi e e toesea ai, ma isi totogi e aofia ai ovataimi, o le a gafa lea ma le tagata poo ai lava sa ia moomia le auaunaga i fafo atu o Tutuila a ofisa o le tiute.”

Maga 4. Ua faavae nei se maga 7.1444.5 e faitauina faapea:

“7.1444.5 Tupe nono e le Malo o Amerika Samoa—Toe faaleleia o Galuega Tetele.

(a) Ina ia tusa ai ma aiaiga o le maga 7.1444(g)(3), lea e faatapulaa ai soo se inivesi i aitalafu poo isi tupe e tuuina mai pe faamauiina e le malo ia le sili atu i le 17.5% o aseta a le Litaeta i le tau na faatau mai ai, e faatagaina le Kovana, e fai ai ma sui o le Malo (ASG) ma le Komiti Faafoe o le Tupe o le Litaeta (ASGERF) e faia se maliliega o se nogatupe e faa’une mai ai e le ASGERF i le Malo (ASG) se tupe e le silia i le \$20,000,000.

(e) E faataga le Kovana na te faaoga le tupe lea e \$20,000,000 e faatupe ai le tau o le faia o galuega toe faaleleia poo se vaega foi o galuega ia o le a ta’ua: faalolotoina o uafu i Tutuila ma Manu’a, fale mo ofisa o le taulaga ma le tineimu, vaa tosovaa, poufaasalalau a le KVZK, faleteuoloo a le tiute, faaopoopoga o le fale mo ofisa o le malo (Ofisa o le Enetia), Ofisa o Palotaga ma le Ofisa o le Puipuiga ma Fautuaga mo tagata e le atoatoa le malosi), faaopoopoga mo le ofisa o lafoga, le tauluga o le fale o ofisa o le malo, ofisa o le lesitala, faaopoopoga o le faletusi, ofisa o femalaga’iga, faleteuoloo mo oloa a le malo, faleteuvaalele, falefaatalipasese/faaeavaa a le malaevaalele ma le auala savali mo pasese, o taligalu, fale e tuu ai meaola ma le ofisa o le foma’imanu, Falefono ma le faatupeina o le Faaaliga o aganuu a le Pasefika. O le a i le Kovana le faaogaina o ni tupe o le nogatupe e fuafua lava i galuega o loo ta’ua i lenei maga (o le “Faaleleia”) ina ia mafai ona faataunuu ai le tele o galuega e mafai ona faia. Afai e manatu le Kovana ua le talafeagai nisi galuega faaleleia poo se vaega foi o ia galuega poo le a lava se mafuaga, e aofia ai ni suiga e faia, le lava o le tupe poo ua taugata tele foi ua sili mamao atu nai lo le mea sa fuafua ai, ona le moomia lea o le Kovana e faatupe ia Galuega faaleleia. O ni tupe e totoe mai le nogatupe e mafai ona faaoga e faatupe ai nisi galuega e pasia atu e le Fonofaitulafono.

(i) O lenei nogatupe o se aitalafu aoao a le Malo o Amerika Samoa ma e faataga le Kovana na te folafola atu le faatuatuga atoa ma le faamoemoeina o le Malo o Amerika Samoa i le vave ona toe totogi atoa o le aofaiga amata ma le tului o lea lava nogatupe. E faatagaina le Kovana, ma/poo sona sui latou te feutaga’ia tuutuuga o le nogatupe, e aofia ai le pasene o le tupu tului, tuutuuga o le toe totogiina ma nisi lava tuutuuga ma aiaiga e faaono manaomia, vagana ai

o le tului e tāmāu i le 7.5%. E faatagaina atili foi le Kovana ma le Komiti Tausimavagega a le Litaea (ASGERF) latou te faagaoioia pepa uma lava ma isi mea e talafeagai ai mo le faamae'aina o lenei faiga-feagaiga, e aofia ai folafolaga tusitusia e faamaonia ai le nofoaitalafu o le Malo (ASG). E faataga le Kovana na te folafola le Faatuatuaina Atoatoa ma le Faamoemoeina o le Malo atoa ai foi ma le tuuina atu o se mea e faamauina ai le aitalafu e pei ona manaomia e le Komiti Tausimavaega a le Litaea ina ia faamausali ai le nogatupe.

(o) O totogi o le aofai na amata ai le nogatupe ma le tului o loo faataga atu i lenei maga e tuu'ese lava mai lea taimi i lea taimi i totonu o se vaitaimi e 10 tausaga ma ia totogi ta'imasina peimeni.

(u) Ua faasoa nei se tupe mai totonu o le teugatupetele a le Malo e talafeagai ma le toe totogiina o le nogatupe ua faatagaina i lenei maga, ina ia faatupe ai le faia o galuega tetele nei: faalolotoina o uafu i Tutuila ma Manu'a, fale mo ofisa o le taulaga ma le tineimu, vaatosovaa, poufaasalalau a le KVZK, faleteuoloa o le tiute, faaopoopoga o le fale mo ofisa o le malo, (Ofisa o le Enetia, Ofisa o Palotaga, ma le Ofisa o le Puipuiga ma Fautuaga mo tagata e le atoatoa le malosi), taulaluga o le fale o ofisa o le malo, faaopoopoga o le faletusi, ofisa o femalaga'iga, faleteuoloa mo oloa a le malo, faleteuvaalele, falefaatalipasese/faaeavaa a le malaevaalele ma le auala savali mo pasese, o taligalu, fale e tuu ai meaola ma le ofisa o le foma'imanu, Falefono ma le faatupeina o le Faaaliga-Aganuu a le Pasefika.

(f) O tupe o le a faaavanoa mai i alatupe nei o le a faailoa atu i lalo mo le toe totogiina o le nogatupe ua faataga i lenei maga e faatupe ai le faaleleia poo le toe faafouina o galuega tetele nei: faalolotoina o uafu i Tutuila ma Manu'a, fale o ofisa o le taulaga/tineimu, vaatosovaa, poufaasalalau a le KVZK, faleteuoloa o le tiute, faaopoopoga o le fale o ofisa o le malo (Enetia, Ofisa Palota ma le Ofisa o le Puipuia ma Fautuaga mo tagata e le atoatoa le malosi), faaopoopoga o le ofisa o lafoga, taulaluga o le fale o ofisa o le malo, faaopoopoga o le faletusi, ofisa o femalaga'iga, faleteuoloa o oloa a le malo, faleteuvaalele, falefaatalipasese/faaeavaa a le malaevaalele ma le auala savali pasese, o taligalu, nofoaga mo meaola ma le ofisa o e vaia ai meaola, falefono ma le faatupeina o Faaaliga aganuu a le Pasefika.

(1) 40% o le lafoga oloa o loo aoina mai le pia ma le molo e pei ona faaee ai e tusa ma le maga 11.1002(a)(1)(A), TTAS.

(2) 12.5% o lafoga oloa o loo aoina mai le 'avamalosi poo taumafa alakaholo e pei ona faaee i le Maga 11.1002(a)(1)(E), TTAS.

(3) 20% o lafoga oloa o loo aoina mai oloa tau tapaa e pei ona faaee ai i le Maga 11.1002(a)(1)(I) TTAS,

(4) O tupemaua uma e aoina mai le totogi o Pepa Ulufale a le Tiute e pei ona faaee aii le maga 27.1014(a)(5) TTAS."

Maga 5. Faasoaina o tupemaua.

Ua faasoaina nei ni tupe mai le teugatupetele a le Malo e talafeagai ma le toe totogiina o le nogatupe o loo faatagaina i lenei maga, ina ia faatupe ai le tau o le faatinoina, faaleleia, poo le toe faafou foi o galuega uma lava poo se vaega foi o galuega tetele nei: faalolotoina o uafu i Tutuila ma Manu'a, fale o ofisa o le taulaga/faletineimu, vaatosovaa a le taulaga, pou faasalalau a le KVZK, faleteuoloa a le tiute, faaopoopoga o fale mo ofisa o le malo (EOB - Ofisa o le Enetia, Ofisa o Palotaga ma le Ofisa o le Puipuia ma le Fautua mo i latou e le atoatoa le malosi), faaopoopoga e faatele i ai le ofisa o lafoga, tauluga o le EOB, faaopoopoga mo le faletusi, ofisa o femalaga'iga, faleteuoloa o le Ofisa o oloa a le Malo, faleteuvaalele, falefaatalipasese/faaeevaa a le malaevaalele ma le auala savali mo pasese, taligalu, nofoaga e tuu ai meaola ma le faletalavai mo meaola, Falefono ma le faatupeina o le Faaaliga-Aganuu a le Pasefika.

Maga 6. Le mea e sau ai le tupe.

E faaavanoa mai tupe mai mea nei o le a ta'ua i lalo e toe totogi ai le nogatupe ua fatagaina i lenei maga mo le faatupeina o galuega i le faatinoina, faaleleia poo le toe faafou o galuega tetele uma o le a ta'ua poo se vaega foi: faalolotoina o uafu i Tutuila ma Manu'a, ofisa o le taulaga/faletineimu, vaatosovaa, pou faasalalau a le KVZK, faleteuoloa a le tiute, faaopoopoga o ofisa o le malo (Ofisa ole Enetia, Ofisa o Palota ma le Ofisa o le Puipuia ma le Fautua mo tagata e le atoatoa le malosi), faaopoopoga mo le ofisa o lafoga, tauluga o le fale o ofisa o le malo, faaopoopoga o le faletusi, ofisa o femalaga'iga, faleteuoloa o oloa a le malo, faleteuvaalele, Falefaatalipasese/faaeevaa i le malaevaalele ma le auala savali mo pasese a vaalele, taligalu, nofoaga e tuu ai meaola ma talavai mo meaola, Falefono ma le faatupeina o le Faaaliga-Aganuu a le Pasefika;

(1) 40% o le lafoga oloa o pia ma taumafa mai le molo e pei ona faaee ai i le TTAS Maga 11.1002(a)(1)(A).

(2) 12.5% o le lafoga oloa mui taumafa alakaholo e pei ona faaee i le TTAS Maga 11.1002(a)(1)(E).

(3) 20% o le lafoga mai oloa tau tapaa e pei ona faaee i le TTAS maga 11.1002(a)(1)(I).

(4) O tupemaua uma lava e aoina mai i le faagaoioia o Pepa e folafola ai ni oloa e tiuteina a le Tiute e pei ona faaee i le TTAS maga 27.1014(a)(5).

Maga 7. Aiaiga o le gagaifo o le la o lenei tulafono

"Ua soloia nei le 7.1444.5 i le aso e mae'a uma ai ona toe totogi le nogatupe ua pasia ma o le 7.1444(g)(3) o le a toe faatulafonoina i lona tulaga sa i ai i le aso ao lei taualoaina lenei Tulafono. E faapito lava le tapulaa o aseta a le Tupe (litaea) atonu e mafai ona faa'italafu ma inivesi e le ASGERF ina ia toe foi i le 10%."

Maga 8. Soloia

“Ua soloia nei le 7.1444.3.”

Maga 9. Aso e taualoa ai.

Talu ai le faanatinati o le manao ina ia tuu atu le pule i le Malo (ASG) e faia ai sse maliliega ma le Litaea (ASGERF) mo se nogatupe e faatupe ai galuega tetele fia faaleleia mo fale o ofisa o le malo, o lea o le a taualoa ai lenei tulafono i le taimi lava e pasia ai e le Fonofaitulafono ma sainia e le Kovana.

Lolo M. Moliga
LOLO M. MOLIGA
Peresetene, Maota Maualuga

Savali Talavou Ale
SAVALI TALAVOU ALE
Fofoga Fetalai, Maota o Sui

Hereby Approved this 23rd day of April 2007
[Signature]
Governor of American Samoa